



Igls victurs digls signurs: (da dretg a san.) 2. Silvio Wieland (Novagnas), 1. Christian Calonder (Favugn), 3. Jürg Bänninger, Spleia.



Igls ple giuvenis en pronts par la partenza.

## Tgombas speartas a bùna mira en las premissas

Da la ple beal'ora d'unviern à gieu liac a Spleia igl tradiziunal biatlonsprint, organiso da l'Uniùn da skiünzs Tambo Spleia, da l'Uniùn da sport Tumpriv a digl Sci Club San Bernardino.

Biabagn 60 partizipantas a partizipants en s'antupos la sonda passada sper igl zenter da passlùng a Spleia par sameter sen la loipa c'era preparada da maniera parfetga. Las sportistas a sportists – par grànda part da la regiùn Viamala, digl Mesoc a digl Tessin – àn samasiro an 10 categorieas.

Durànt la concurenza e'gl sto d'absolver igl ple d'abot pussevel las dus rundas da passlùng an tecnica libra, da trer igls tschentg sagets a schaschànd a sainza falar. Par mintga sbagl da sagitar à'gl do egn castitg da 10 secundas. Igl tir da quella concurenza e vagnieu acumpagnieu, ascheia c'ear tiraduras a tiradurs giuvenis àn stgieu s'apartizipar par rimnar custevas experienzgas a saschar incantar pigl sport da biatlon.

### Christian Calonder da Favugn victur digl gi

L'ustreia era andrizada an la remisa per igl campadi. Là vagneva survieu supa, liongias da Spleia, salata da hardefels a petas a las a parizipantas a partizipants fumantos àn prieu la caschùn da far ra-

schienis sur da la cursa. Seglsuainter e'gl vagnieu do part la rangaziùn a prieu cumgieu da las sportistas ad igls sportists.

Christian Calonder da Favugn e davanto victur digl gi. El à cuntanschieu igl miglier tains da cursa cun 5 minutas a 18 secundas, targiànd tschent sagets sainza macla. La partiziùn feminina e vagnida dominada da Noemi Simmen da Spleia. Ella à absolvieu igl tschancùn dad 1,8 km an 6 minutas a 18 secundas, inclusas las 10 secundas suplementaras.

La proxima ocurenza digl Club da skiünzs Tambo Spleia à liac la fegn d'anda digls 3 antoc'igls 5 da marz. Alura anvidan igl SC Tambo Spleia a tut tschellas uniùns da la Valragn agls 18avelis campionadis da skis internaziunals digls Gualsers. Cun quella caschùn vean fatg sport a tgirada da cuminànza culturala digls Gualsers. (cfe/bt)

L'antiera classificaziùn ad ulteriuras infurmaziùns en da catar sen la pagina: sctambospluegen.ch



Concentraziùn cumplagna e pretandida pigl tir acumpagnieu.

FOTOS SC TAMBO SPLEIA

## MATON

### Giantar cuminevel a Maton

Igl proxim giantar cuminevel da las senioras ad igls seniors da Ziràn a la Muntogna da Schons à liac igls 24 da favrer an l'ustreia Muntsolej a Maton. Las anuntzgas en da far antoca la gievgia, igls 23 da favrer, a Liesbeth Beglinger, davent da las 18:00 a telefon 081 630 73 51. Ear an cass d'amparadas viglian ign sadrizar a l'organisatura. (cdm/fmr)

## BEIVA

### Pers la controlla digl auto

Ena giovna da 18 onns è la dumengia sivamezde carada ansemen cun en conatist sen la veia digl Gelgia da Beiva an direziùn Savognin. Allas 16.10 ò ella lia surpassar ples vehichels sen l'otezsa da Stalveder. Siva d'aveir passo igls autos ò ella dantant pers la controlla da sies vehichel ed è eida sur veia or. Igl auto è collido cun la seiv da siertad ed ena pitga da lenn è sa furada tras la fanestra davant. En team digl salvamaint digl Grischun Central ò transporto las dus persungas aint igl spital a Savognin per igl tramaint ambulat. La Pulizeia cantunala digl Grischun sclarescha igl accident. (cdm/fmr)

## CUNTER

### Dus persungas blessadas

Dumengia sivamezde èn dus persungas sa disgratzgedas a Cunter durant lavours ve dad ena stora da suglegl. Chegl screiva la pulizeia ainten ena comunicaziùn allas medias. Egna dallas persungas è sa blessada mez grev, l'otra è sa blessada levamaintg. Siva d'ampremas ancunaschienschas è igl om crudo d'ena stgela ed ò scarpo giu la stora da suglegl. Ena part da chella ò tutgia sia donna. (cdm/fmr)

## CHANT

### Il chor da giuvenils chanta en il City West

Ils 17 da favrer vegn cuntinuada la retscha d'eveniments culturals en il center da cumpra City West a Cuira. A las 18.30 chanta là il chor d'uffants e giuvenils da la «Stimmwerkbande».

Chantar unescha, fa plaschair e promova la schientscha per sasez. Quai è la persuasiun dals respunabels da la «Stimmwerkbande», la scola da chant per uffants e giuvenils che ha fundà l'emna passada in chor cun var 30 vuschs er en la regiun da Tusaun. Cun quai crescha ses dumber a passa 100 chantaduras e chantadurs giuvenils. Quest chor mussa sias ambiziuns chanticas e artisticas adina puspè a chaschun da represchentaziuns publicas, sco il venderdi proxim en il rom da la retscha dals eveniments culturals «chor-west».

#### Cun plascher ed ambiziùn

Chantar, sautar ed avair plaschair. Quai è ils pilasters da la «Stimmwerkbande». Cun chanzuns, moviments, gies e produziuns publicas vegn intermedià il palschair da chantar e sautar als uffants e giuvenils. Cun la scolaziùn adattada emprendan quels da duvrar il corp e la vusch da maniera optimala. La scolaziùn vegn dada da magistras e magisters professionals. Cun emprendre chanzuns en plirs linguatgs vegn er promovì il sentiment linguistic ed ellas dattan invista en culturas estras. A chaschun dal concert da radund trais quarts d'ura chanta la «Stimmwerkbande» parts da ses program annual «Flower Power».

#### Cultura en il center da cumpra

La finamira dal center «chor-west», localisà en la Via Commerciala 19, èsi da porscher ina



Il chor da giuvenils da la «Stimmwerkbande» sa preschenta venderdi proxim en il pieren da supermarketà City West a Cuira.

FOTO MAD

retscha da concerts e da purtar cultura chantica er en questa part da la citad. Realisàda vegn quella finamira cun organisar concerts mensils en il pieren dal supermarketà al vest

da Cuira, per ils quals i vegnan envidadas diversas furnaziuns grischunas. Là survegnan quellas ina tribuna per dar in schatg da lur activitads artisticas. (cdm/fmr)